

四庫全書

子部

欽定四庫全書

子部
朱子語類卷三十五

詳校官中書臣程炎

刑部郎中臣許兆椿覆勘

總校官中書臣朱鈐

校對官助教臣卜惟吉

謄錄監生臣謝蓮鏐

欽定四庫全書

朱子語類卷三十五

論語十七

泰伯篇

泰伯其可謂至德章

泰伯得稱至德為人所不能為

可學

問泰伯可謂至德由這是於民無得而稱焉處見人都
不去看這一句如此則夫子只說至德一句便了何

必更下此六箇字公更仔細去看這一句煞有意思
義剛言夫子稱泰伯以至德稱文王亦以至德稱武
王則曰未盡善若以文王比武王則文王為至德若
以泰伯比文王則泰伯為至德文王三分天下有其
二比泰伯已是不得全這一心了曰是如此義剛又
言泰伯若居武王時牧野之師也自不容已蓋天命
人心到這裏無轉側處了曰却怕泰伯不肯恁地做
聖人之制行不同或遠或近或去或不去雖是說他

心只是一般然也有做得不同處范益之問文王如何曰似文王也自不肯恁地做了縱使文王做時也須做得較詳緩武王做得大故麁暴當時紂既投火了武王又却親自去斫他頭來梟起若文王恐不肯恁地這也難說武王當時做得也有未盡處所以東坡說他不是聖人雖說得太過然畢竟是有未盡處義剛曰武王既殺了紂有微子賢可立何不立之而必自立何也先生不答但感眉再言這事也難說

義剛

陳仲亨說至德引義剛前所論者為疑曰也不是不做
這事但他做得較雍容和緩不似武王樣暴泰伯則
是不做底若是泰伯當紂時他也只是為諸侯太王
翦商自是他周人恁地說若無此事他豈肯自誣其
祖左氏分明說泰伯不從不知不從甚麼事東坡言
三分天下有其二文王只是不管他此說也好但文
王不是無思量觀他戡黎伐崇之類時也顯然是
在經營又曰公劉時得一土做得盛到太王被狄人苦

楚時又衰了太王又旋來那岐山下做起家計但岐山下却亦是商經理不到處亦是空地當時邠也只是一片荒涼之地所以他去那裏輯理起來

義剛

問泰伯之讓知文王將有天下而讓之乎抑知太王欲傳之季歷而讓之乎曰泰伯之意却不是如此只見太王有翦商之志自是不合他意且度見自家做不得此事便掉了去左傳謂泰伯不從是以不嗣不從即是不從太王翦商事耳泰伯既去其勢只傳之季

歷而季歷傳之文王泰伯初來思量正是相反至周得天下又都是相成就處看周內有泰伯虞仲外有伯夷叔齊皆是一般所見不欲去圖商寓

問泰伯知太王有取天下之志而王季又有聖子故讓去曰泰伯惟是不要太王有天下或問太王有翦商之志果如此否曰詩裏分明說實始翦商又問恐詩是推本得天下之由如此曰若推本說不應下實始翦商看左氏云泰伯不從是以不嗣這甚分明這事

也難說他無所據只是將孔子稱泰伯可謂至德也已矣是與稱文王一般泰伯文王伯夷叔齊是行一不義殺一不辜而得天下不為底道理太王湯武是弔民伐罪為天下除殘賊底道理常也是道理合如此變也是道理合如此其實只是一般又問堯之讓舜禹之傳子湯伐桀武王伐紂周公誅管蔡何故聖人所遇都如此先生笑曰後世將聖人做模範却都如此差異信如公問然所遇之變如此到聖人處之

皆焦地所以為聖人故曰遭變事而不失其常孔子曰可與適道未可與立可與立未可與權公且就平

平正正處看

賀孫

吳伯英問秦伯知太王欲傳位季歷故斷髮文身逃之荆蠻示不復用固足以遂其所志其如父子之情何曰到此却顧卹不得父子君臣一也太王見商政日衰知其不久是以有翦商之意亦至公之心也至於秦伯則惟知君臣之義截然不可犯也是以不從二

者各行其心之所安聖人未嘗說一邊不是亦可見
矣或曰斷髮文身乃仲雍也泰伯則端委以治吳然
吳之子孫皆仲雍之後泰伯盖無後也

壯祖

問泰伯事曰這事便是難若論有德者興無德者亡則
天命已去人心已離便當有革命之事畢竟人之大
倫聖人且要守得這箇看聖人反覆嘆咏泰伯及文
王事而於武又曰未盡善皆是微意雙孫
因說泰伯讓曰今人纔有些子讓便惟恐人之不知

伯豐問集注云太王因有翦商之志恐魯頌之說只是推本之辭今遂據以為說可否曰詩中分明如此說又問如此則太王為有心於圖商也曰此是難說書亦云太王肇基王迹又問太王方為狄人所侵不得已而遷岐當時國勢甚弱如何便有意於取天下曰觀其初遷底規模便自不同規模才立便張大如文王伐崇伐密氣象亦可見然文王猶服事商所以為

至德

替○
集注

泰伯章所引其心即夷齊之心而事之難處有甚焉者
不是說遜國事自是說夷齊諫武王不信便休無甚
利害若泰伯不從翦商之志却是一家內事與諫武
王不同所以謂之難處非說遜國事也集注說亦未

分曉耳

明作

泰伯之心即伯夷叩馬之心太王之心即武王孟津之
心二者道並行而不相悖然聖人稱泰伯為至德謂
武為未盡善亦自有抑揚蓋泰伯夷齊之事天地之

常經而太王武王之事古今之通義但其間不無此
子高下若如蘇氏用三五百字罵武王非聖人則非
矣於此二者中須見得道並行而不悖處乃善因問
泰伯與夷齊心同而謂事之難處有甚焉者何也曰
夷齊處君臣間道不合則去泰伯處父子之際又不
可露形迹只得不分不明且去某書謂太王有疾泰
伯採藥不返疑此時去也

錄

問泰伯讓天下與伯夷叔齊讓國其事相類何故夫子

一許其得仁一許其至德二者豈有優劣耶曰亦不必如此泰伯初未嘗無仁夷齊初未嘗無德

壯祖

問三以天下讓程言不立一也逃之二也文身三也不知是否曰據前輩說亦難考他當時或有此三節亦未可知但古人辭必至再三想此只是固讓

寓○集注

恭而無禮章

禮只是理只是看合當恁地若不合恭後却必要去恭則必勞若合當慎後慎則不憊若合當勇後勇則不

亂若不當直後却須要直如證羊之類便是絞

義剛

問故舊不遺則民不偷蓋人皆有此仁義之心篤於親是仁之所發故我篤於親則民興仁篤故舊是義之發故不遺故舊則民興義是如此否曰看不偷字則又似仁大槩皆是厚底意思不遺故舊固是厚這不偷也是厚却難把做義說

義剛

問君子篤於親與恭慎勇直處意自別橫渠說如何曰橫渠這說且與存在某未敢決以為定若做一章說

就橫渠說得似好他就大處理會便知得品節如此
問橫渠說知所先後先處是篤於親與故舊不遺曰
然問他却將恭慎等處入在後段說是如何曰就他
說人能篤於親與不遺故舊他大處自能篤厚如此
節文處必不至大段有失他合當恭而恭必不至於
勞謹慎必不至於畏縮勇直處亦不至於失節若不
知先後要做便做更不問有六親眷屬便是證父攘

羊之事

高○
集注

鄭齊卿問集注舉橫渠說之意曰他要合下面意所以如此說蓋有禮與篤親不遺故舊在先則不憚不勞不亂不絞與興仁不偷之效在後耳要之合分為二章又問直而無禮則絞曰絞如繩兩頭絞得緊都不寬舒則有證父攘羊之事矣

木之

張子之說謂先且篤於親不遺故舊此其大者則恭慎勇直不至難用力此說固好但不若吳氏分作兩邊

說為是

明作

問橫渠知所先後之說其有所節文之謂否曰橫渠意是如此篤於親不遺故舊是當先者恭慎之類却是後必大

曾子有疾謂門弟子章

正卿問曾子啟手足章曰曾子奉持遺體無時不戒謹恐懼直至啟手足之時方得自免這箇身已直是頃刻不可不戒謹恐懼如所謂孝非止是尋常奉事而已當念慮之微有毫髮差錯便是悖理傷道便是不

孝只看一日之間內而思慮外而應接事物是多多
少少這箇心畧不點檢便差失了看世間是多少事
至危者無如人之心所以曾子常常恁地戰戰兢兢
如臨深淵如履薄冰

賀孫

問曾子戰兢曰此只是戒謹恐懼常恐失之君子未死
之前此心常恐保不得便見得人心至危且說世間
甚物事似人心危且如一日之間內而思慮外而應
接千變萬化剗眼中便走失了剗眼中便有千里萬

里之遠所謂人心惟危道心惟微只理會這箇道理
分曉自不危惟精惟一便是守在這裏允執厥中便
是行將去

恪

曾子曰戰戰兢兢如臨深淵如履薄冰此乃敬之法此
心不存則常昏矣今人有昏睡者遇身有痛痒則蹶
然而醒蓋心所不能已則自不至於忘中庸戒謹恐
懼皆敬之意

洽

時舉讀問目曰依舊有過高傷巧之病切須放令平實

曾子啟手足是如此說固好但就他保身上面看自

極有意思也

時舉

曾子有疾孟敬子問之章

問正顏色斯近信矣此其形見於顏色者如此之正則
其中之不妥可知亦可謂信實矣而只曰近信何故

曰聖賢說話也寬也怕有未便恁地底

義剛

問正顏色斯近信如何是近於信曰近是其中有這信
與行處不違背多有人見於顏色自恁地而中却不

恁地者如色厲而內荏色取仁而行違皆是外面有許多模樣所存却不然便與信遠了只將不好底對看便見寓

出辭氣斯遠鄙倍是脩辭立其誠意思

賀孫

出辭氣人人如此工夫却在下面如非禮勿視非禮勿

聽人人皆然工夫却在勿字上

泳

毅父問遠暴慢章曰此章暴慢鄙倍等字須要與他看暴是麓厲慢是放肆蓋人之容貌少得和平不暴則

慢暴是剛者之過慢是寬柔者之過鄙是凡淺倍是背理今人之議論有見得雖無甚差錯只是淺近者此是鄙又有說得甚高而實背於理者此是倍不可不辨也

時舉

仲蔚說動容貌章曰暴慢底是大故麓斯近信矣這須是裏面正後顏色自恁地正方是近信若是色取仁而行違則不是信了倍只是倍於理出辭氣時須要看得道理如何後方出則不倍於理問三者也似只

一般樣曰是各就那事上說又問要恁地不知如何

做工夫曰只是自去持守

池錄作只是隨事
去持守○義剛

君子所貴乎道者三一章是成就處

升卿○以
下總論

君子所貴乎道者三此三句說得太快大槩是養成意

思較多賜

陳寅伯問君子所貴乎道者三曰且只看那所貴二字

莫非道也如籩豆之事亦是道但非所貴君子所貴
只在此三者動容貌斯遠暴慢矣斯字来得甚緊動

容貌便須遠暴慢正顏色便須近信出辭氣便須遠鄙倍人之容貌只有一箇暴慢雖淺深不同暴慢則一如人狼戾固是暴稍不溫恭亦是暴如人倨肆固是慢稍或怠緩亦是慢正顏色而不近信却是色莊信實也正顏色便須近實鄙便是說一樣卑底說話倍是逆理辭氣只有此二句因曰不易孟敬子當時焉得如此好或云想曾子病亟門人多在傍者曰恐是如此因說看文字須是熟後到自然脫落處方是

某初看此都安排不成按得東頭西頭起按得前面後面起到熟後全不費力要緊處却在那斯字矣字這般閒字上此一段程門只有尹和靖看得出孔子曰學而時習之不亦說乎若熟後真箇使人說今之學者只是不深好後不得其味只是不得其味後不

深好

文蔚

敬之問此章曰君子所貴乎道者三是題目一句下面要得動容貌便能遠暴慢要得正顏色便近信出辭

氣便遠鄙倍要此須是從前做工夫

植

問君子所貴乎道者三曰此言君子存養之至然後能如此一出辭氣便自能遠鄙倍一動容貌便自能遠暴慢正顏色便自能近信所以為貴若學者則雖未能如此當思所以如此然此亦只是說效驗若作工夫則在此句之外

雉

楊問君子所貴乎道者三若未至此如何用工曰只是就容貌辭色之間用工更無別法但上面臨時可做

下面臨時做不得須是熟後能如此初間未熟時雖

蜀本淳錄
作須字

是動容貌到熟後自然遠暴慢雖是正顏

色到熟後自然近信雖是出辭氣到熟後自然遠鄙

倍

滿○淳錄此下云辭是言語氣是聲音出是從這
裡出去三者是我身上事要得如此道豆雖是未

亦道之所在不可不謹然此則
有司之事我亦只理會身上事

動容貌斯遠暴慢正顏色斯近信出辭氣斯遠鄙倍須

要理會如何得動容貌便會遠暴慢正顏色便會近

信出辭氣便會遠鄙倍須知得曾子如此說不是到

動容貌正顏色出辭氣時方自會恁地須知得工夫
在未動容貌未正顏色未出辭氣之前又云正顏色
若要相似說合當着得箇遠虛偽矣動出都說自然
惟正字却似方整頓底意思蓋緣是正顏色亦有假
做恁地內實不然者若容貌之動辭氣之出却容偽
不得賀孫

問君子所貴乎道者三曰看來三者只是非禮勿視非
禮勿聽非禮勿言非禮勿動又問要之三者以涵養

為主曰涵養便是只這三者便是涵養地頭但動容
貌遠暴慢便是不遠暴慢便不是顏色近信便是不
近信便不是素

君子所貴乎道者三或云須是工夫持久方能得如此
否曰不得人之資稟各不同資質好者纔知得便把
得定不改變資質遲慢者須大段着力做工夫方得
因舉徐仲車從胡安定學一日頭容少偏安定忽厲
聲云頭容直徐因思不獨頭容直心亦要直自此不

敢有邪心又舉小南和尚偶靠倚而坐其師見之厲聲叱之曰恁地無脊梁骨小南聞之聳然自此終身不靠倚坐這樣人都是資質美所以一撥便轉終身不為個

問所謂暴慢鄙倍皆是指在我者言否曰然曰所以動容貌而暴慢自遠者工夫皆在先與曰此只大綱言人合如此固是要平日曾下工夫然即今亦須隨事

省察不令間斷

廣

叔京來問所貴乎道者三因云正動出時也要整齊平
時也要整齊方云乃是敬貫動靜曰恁頭底人言語
無不貫動靜者方

或問遠與近意義如何曰曾子臨終何嘗又安排下這
字如此但聖賢言語自如此耳不須推尋不要緊處
動容貌斯遠暴慢是為得人好正顏色斯近信是顏色
寔出辭氣斯遠鄙倍是出得言語是動正出三字皆
是輕說過君子所貴於此者皆平日功夫所至非臨

事所能捏合籩豆之事雖亦莫非道之所在然須先擇切已者為之如有闕睢麟趾之意便可行周官法度又如畫得皇極之五事便有庶徵之應以籩豆之事告孟敬子必其所為有以煩碎為務者

謨

君子所貴乎道者三言道之所貴者有此三事便對了道之所賤者籩豆之事非不是道乃道之末耳如動容貌正顏色出辭氣須是平日先有此等工夫方如此効驗動容貌斯遠暴慢矣須只做一句讀斯字只

是自然意思楊龜山解此一句引曾子脩容閤人避
之事却是他人恭慢全說不着人傑

問君子所貴乎道者三至籩豆之事則有司存曰以道
言之則不可謂此為道彼為非道然而所貴在此則
所賤在彼矣其本在此則其末在彼矣人傑

君子所貴乎道者三乃是切於身者若籩豆之事特有
司所職掌耳今人於制度文為一一致察未為不是
然却於大體上欠闕則是棄本而求末也人傑

問君子所貴乎道者三曰學者觀此一段須看他兩節
先看所貴乎道者是如何這箇是所貴所重者至於
一邊一豆皆是理但這箇事自有人管我且理會箇
大者且如今人講明制度名器皆是當然非不是學
但是於自己身上大處却不曾理會何貴於學先生
因言近來學者多務高遠不自近處着工夫有對者
曰近來學者誠有好高之弊有問伊川如何是道伊
川曰行處是又問明道如何是道明道令於父子君

臣兄弟上求諸先生言如此初不曾有高遠之說曰
明道之說固如此然父子兄弟君臣之間各有一箇
當然之理是道也

謙之

義剛說君子所貴乎道者三一章畢因曰道雖無所不
在而君子所重則止此三事而已這也見得窮理則
不當有小大之分行已則不能無緩急先後之序先
生曰這樣處也難說聖賢也只大槩說在這裏而今
說不可無先後之序固是但只揀得幾件去做那小

底都不照管也不得義剛因言義剛便是也疑以為古人事事致謹如所謂克勤小物豈是盡視為小而不
管曰這但是說此三事為最重耳若是其他也不是
不管只是說人於已身上事都不照管却只去理會
那籩豆等小事便不得言這箇自有司在但責之
有司便得若全不理會將見以籩為豆以豆為籩都
無理會了田子方謂魏文侯曰君明樂官不明樂音
此說固好但某思之人君若不曉得那樂却如何知

得那人可任不可任這也須曉得方解去任那人方不被他謾如蘧豆之類若不曉如何解任那有司若蘧裏盛有汁底物事豆裏盛乾底物事自是不得也須着曉始得但所重者是上面三事耳

義剛

舜功問君子所貴乎道者三曰動容貌則能遠暴慢正顏色則能近信出辭氣則能遠鄙倍所貴者在此至於蘧豆之事雖亦道之所寓然自有人管了君子只脩身而已蓋常人容貌不暴則多慢顏色易得近色

莊言語易得鄙而倍理前人愛說動字出字正字上
有工夫看得來不消如此 璘

正卿問正顏色之正字獨重於動與出字何如曰前輩
多就動正出三字上說一向都將三字重了若從今
說便三字都輕却不可於中自分兩樣某所以不以
彼說為然只緣看文勢不恁地君子所貴乎道者三
是指夫道之所以可貴者為說故云道之所以可貴
者有三事焉故下數其所以可貴之實如此若禮文

器數自有官守非在所當先而可貴者舊說所以未
安者且看世上人雖有動容貌者而便辟足恭不能
遠暴慢雖有正顏色者而色取仁而行違多是虛偽
不能近信雖有出辭氣者而巧言飾辭不能遠鄙倍
這便未見得道之所以可貴矣道之所以可貴者惟
是動容貌自然便會遠暴慢正顏色自然便會近信
出辭氣自然便會遠鄙倍此所以貴乎道者此也又
云三句最是正顏色斯近信見得分明

賀孫

或問君子所貴乎道者三如何曰動容貌正顏色出辭
氣前輩不合將做工處此只是涵養已成效驗處
暴慢鄙倍近信皆是自已分內事惟近信不好理會
蓋君子才正顏色自有箇誠實底道理異乎色取仁
而行違者也所謂君子所貴乎道者三道雖無乎不
在然此三者乃修身之要為政之本故可貴容貌是
舉一身而言顏色乃見於面顏者而言又問三者固
是效驗處然不知於何處用工曰只平日涵養便是

去偽

某病中思量曾子當初告孟敬子人之將死其言也善
只說出三事曾子當時有多少好話到急處都說不
辦只撮出三項如此這三項是最緊要底若說這三
事上更做得工夫上面又大段長進便不長進也做
得箇聖賢坯模雖不中不遠矣

恪

所貴乎道者三

禮亦是道但道中所貴此三者在身上

李先生云曾子臨

死空洞中只餘此念

方

或講所貴乎道者三曰不必如此說得巧曾子臨死時
話說必不暇如此委曲安排 必大

注云暴粗厲也何謂粗厲曰粗不精細也

節○
集注

問先生舊解以三者為脩身之驗為政之本非其平日
莊敬誠實存省之功積之有素則不能也專是做效
驗說如此則動正出三字只是間字後來改本以驗
為要非其以下改為學者所當操存省察而不可有
造次頃刻之違者也如此則工夫却在動正出三字

上如上蔡之說而不可以效驗言矣某疑動正出三字不可以為做工夫字正字尚可說動字出字豈可以為工夫耶曰這三字雖不是做工夫底字然便是做工夫處正如着衣喫飯其着其喫雖不是做工夫然便是做工夫處此意所爭只是絲髮之間要人自認得舊來解以為效驗語似有病故改從今說蓋若專以為平日莊敬持養方能如此則不成未莊敬持養底人便不要遠暴慢近信遠鄙便是舊說效驗

字太深有病

憊

君子所貴乎道者三以下三節是要得憊地須是平日
莊敬工夫到此方能憊地若臨時做工夫也不解憊
地植因問明道動容周旋中禮正顏色則不忘出辭
氣正由中出又仍是以三句上半截是工夫下半截
是功效曰不是所以憊地也是平日莊敬工夫植
問動也正也出也不知是心要得如此還是自然發見
氣象曰上蔡諸人皆道此是做工夫處看來只當作

成效說涵養莊敬得如此工夫已在前了此是效驗
動容貌若非涵養有素安能便遠暴慢正顏色非莊
敬有素安能便近信信是信寔表裏如一色有色厲
而內荏者色莊也色取仁而行違者苟不近寔安能
表裏如一乎問正者是着力之辭否曰亦着力不得
若不到近寔處正其顏色但見作偽而已問遠之字
義如何曰遠便是無復有這氣象問正顏色既是功
效到此則宜自然而信却言近信何也曰這也是對

上遠字說

寓○
集義

問君子道者三章謝氏就動正出上用五竊謂此三句其要緊處皆是斯字上蓋斯者便自然如此也才動容貌便自然遠暴慢非平昔涵養之熟何以至此此三句乃以效言非指用功地步也曰是如此

柄

舜功問動容貌如何遠暴慢曰人之容貌非暴則慢得中者極難須是遠此方可此一段上蔡說亦多有未是處問其言也善何必曾子天下自有一等人臨死

言善通老云聖賢臨死不亂曰聖賢豈可以不亂言
曾子到此愈極分明易箒事可見然此三句亦是由
中以出不是外向闕撰成得可學

動容貌出辭氣先生云只伊川語解平平說未有如此

張筋弩力意思

謂上蔡語
方子

曾子以能問於不能章

陳仲亨說以能問於不能章曰想是顏子自覺得有未
能處但不比常人十事曉得九事那一事便不肯問

人觀顏子無伐善無施勞看他也是把此一件做工夫又問君子人與是才德出衆之君子曰託六尺之孤寄百里之命才者能之臨大節而不可奪則非有德者不能也

義剛

舉問犯而不校曰不是着意去容他亦不是因他犯而遂去自反蓋其所存者廣大故人有小小觸犯處自不覺得何暇與之校耶

時舉

不校是不與人比校強弱勝負道我勝你負我強你弱

如上言以能問於不能之類皆是不與人校也 熈

子善問犯而不校恐是且點檢自家不暇問他人曰不是如此是他力量大見有犯者如蚊蚋蟲子一般何足與校如汪汪萬頃之波澄之不清撓之不濁亞夫問黃叔度是何樣底人曰當時亦是衆人扛得如此看來也只是篤厚深遠底人若是有所見亦須說出來且如顏子是一箇不說話底人有箇孔子說他好若孟子無人印證他他自發出許多言語豈有自孔

孟之後至東漢黃叔度時已是五六百年若是有所見亦須發明出來安得言論風旨全無聞亞夫云郭林宗亦主張他曰林宗何足憑且如元德秀在唐時也非細及就文粹上看他文章乃是說佛

南升

顏子犯而不校是成德事孟子三自反却有着力處學者莫若且理會自反却見得自家長短若遽學不校却恐儻侗都無是非曲直下梢於自己分却恐無益

蒙端

或問犯而不校若常持不校之心如何曰此只看一箇
公私大小故伊川云有當校者順理而已方子

大丈夫當容人勿為所容

顏子犯而不校
○子蒙

問如此已是無我了集注曰非幾於無我者不能何也
曰聖人則全是無我顏子却但是不以我去壓人却
尚有箇人與我相對在聖人和人我都無義剛

問幾於無我幾字莫只是就從事一句可見耶抑併前
五句皆可見耶犯而不校則亦未能無校此可見非

聖人事矣曰顏子正在着力未着力之間非但此處可見只就從事上看便分明不須更說無校也

曾子曰可以託六尺之孤章

聖人言語自渾全溫厚曾子便恁地剛有孟子氣象如可以託六尺之孤可以寄百里之命臨大節而不可奪等語見得曾子直是峻厲

淳

問可以託六尺之孤

云云

不知可見得伊周事否曰伊

周亦未足道此只說有才志氣節如此亦可為君子

之事又問下此一等如平勃之入北軍迎代王霍將
軍之擁昭立宣可當此否曰這也隨人做聖人做出
是聖人事業賢人做出是賢人事業中人以上是中
人以上事業這通上下而言君子人與君子人也上
是疑詞如平勃當時這處也未見得若誅諸呂不成
不知果能死節否古人這處怕亦是幸然如此如藥
殺許后事光後來知却含糊過似這般所在解臨大
節而不奪否恐未必然因言今世人多道東漢名節

無補於事某謂三代而下惟東漢人才大義根於其
心不顧利害生死不變其節自是可保未說公卿大
臣且如當時郡守懲治宦官之親黨雖前者既為所
治而來者復蹈其迹誅殛竄戮項背相望略無所創
今士大夫顧惜畏懼何望其如此平居暇日琢磨淬
厲緩急之際尚不免於退縮况游談聚議習為軟熟
卒然有警何以得其仗節死義乎大抵不顧義理只
計較利害皆奴婢之態殊可鄙厭又曰東坡議論雖

不能無偏頗其氣節直是有高人處如說孔北海曹操使人凜凜有生氣又曰如前代多有幸而不敗者如謝安桓溫入朝已自無策從其廢立九錫已成但故為遷延以俟其死不幸而病小甦則將何以處之擁重兵上流而下何以當之於此看謝安果可當仗節死義之資乎寓曰坦之倒持手板而安從容閑雅似亦有執者曰世間自有一般心膽大底人如廢海西公時他又不能拒廢也得不廢也得大節在那裏

寓○砥

錄畧

正卿問可以託六尺之孤至君子人也此本是蕪才節
說然緊要處却在節操上曰不然三句都是一般說
須是才節蕪全方謂之君子若無其才而徒有其節
雖死何益如受人託孤之責自家雖無欺之之心却
被別人欺了也是自家不了事不能受人之託矣如
受人百里之寄自家雖無竊之之心却被別人竊了
也是自家不了事不能受人之寄矣自家徒能臨大

節而不可奪却不能了得他事雖能死也只是箇枉
死漢濟得甚事如晉之荀息是也所謂君子者豈是
斂手束脚底村人耶故伊川說君子者才德出衆之
名孔子曰君子不器既曰君子須是事事理會得方
可若但有節而無才也喚做好人只是不濟得事個
正卿問託六尺之孤一章曰百里之命只更命令之命
託六尺之孤謂輔幼主寄百里之命謂攝國政曰如
霍光當得此三句否曰霍光亦當得上面兩句至如

許后之事則大節已奪了曰託孤寄命雖資質高者亦可及臨大節而不可奪非學問至者恐不能曰資質高底也都做得學問到底也都做得大抵是上兩句易下一句難譬如說有猷有為有守託孤寄命是有猷有為臨大節而不可奪却是有守霍光雖有為有猷矣只是無所守

恪

託六尺之孤寄百里之命是才臨大節不可奪是德如霍光可謂有才然其毒許后事便以愛奪了燕慕容

恪是慕容暉之霍光其輔幼主也好然知慕容評當去而不去之遂以亂國此也未是惟孔明能之

賜○
夔孫

同

問君子人與君子人也曰所謂君子這三句都是不可少底若論文勢却似臨大節不可奪一句為重然而須是有上面託六尺之孤寄百里之命却臨大節而不可奪方足以為君子此所以有結語也

煮

問可以託六尺之孤可以寄百里之命又能臨大節而

不可奪方可謂之君子是如此看否曰固是又問若徒能臨大節不可奪而才力短淺做事不得如荀息之徒僅能死節而不能止難要亦不可謂之君子曰也是不可謂之君子

義剛

問胡文定以荀息為可以託六尺之孤寄百里之命臨大節而不可奪如何曰荀息便是不可以託孤寄命了問聖人書荀息與孔父仇牧同辭何也曰聖人也且是要存得箇君臣大義

夔孫

問君子才德出衆之名曰有德而有才方見於用如有德而無才則不能為用亦何足為君子

君子人與章
伊川說○兼

曾子曰士不可以不弘毅章

弘毅二字弘雖是寬廣却被人只把做度量寬容看了便不得且如執德不弘之弘便見此弘字謂為人有許多道理及至學來下梢却做得狹窄了便是不弘蓋緣只以己為是凡他人之言便做說得天花亂墜我亦不信依舊只執己是可見其狹小何緣得弘須

是不可先以別人為不是凡他人之善皆有以受之
集衆善之謂弘伯豐問是寬以居之否曰然如人能

弘道却是以弘為開廓弘字却是作用

論弘

問弘毅之弘曰弘是寬廣事事著得道理也著得事物
也著得事物逆來也著得順來也著得富貴也著得
貧賤也著得看甚麼物事來掉在裏面都不見形影

了
憫

弘字只將隘字看便見得如看文字相似只執一說見

衆說皆不復取便是不弘若是弘底人便包容衆說
又非是於中無所可否包容之中又為判別此便是

弘植

弘有耐意如有一行之善便道我善了更不要進能些
小好事便以為只如此足矣更不向前去皆是不弘
之故如此其小安能擔當得重任淳

所謂弘者不但是放令公平寬大容受得人須是容受
得許多衆理若執着一見便自以為是他說更入不

得便是滯於一隅如何得弘須是容受軋捺得衆理

方得

謙之

恭甫問弘是心之體毅是心之力曰心體是多少大大而天地之理纔要思量便都在這裏若是世上淺心

私已底人有一兩件事便着不得

賀孫

問如何是弘曰計較小小利害小小得失褊隘如公欲執兩事終身行之皆是不弘說道自家不敢承當說道且據自己所見皆是不弘

節

士不可以不弘毅這曾子一箇人只恁地他肚裏却著得

無限今人微有所得欣然自以為得

祖道

毅是立脚處堅忍強厲擔負得去底意

升脚○以下兼論毅

敬之問弘是容受得衆理毅是勝得箇重任曰弘乃能

勝得重任毅便是能擔得遠去弘而不毅雖勝得任

却恐去前面倒了

時舉

問弘是寬容之義否曰固是但不是寬容人乃寬容得義理耳毅字曾子以任重言之人之狹隘者只守得

一義一理便自足既滯一隅却如何能任重必能容納吞受得衆理方是弘也 必大

仲蔚問弘毅曰弘不只是有度量能容物之謂正是執德不弘之弘是無所不容心裏無足時不說我德已如此便住如無底之谷擲一物於中無有窮盡若有滿足之心便不是弘毅是忍耐持守着力去做 義剛

問弘毅曰弘是寬廣耐事事事都著得道理也著得多人物也著得多若著得這一箇著不得那一箇便不

是弘且如有兩人相爭須是寬著心都容得始得若
便分別一人是一人非便不得或兩人都是或兩人
都非或是者非非者是皆不可知道理自是箇大底
物事無所不備無所不包若小著心如何承載得起
弘了却要殺弘則都包得在裏面了不成只恁地寬
廣裏面又要分別是非有規矩始得若只恁地弘便
沒倒斷了任重是擔子重非如任天下之任又曰若
繞小着
這心便容兩箇不得心裏只著得一箇這兩箇便相
挂碍在這裏道理也只著得一說事事都只著得一

邊○憊

問曾子弘毅處不知為學工夫久方會恁地或合下工夫便着恁地曰便要恁地若不弘不毅難為立脚問人之資稟偏駁如何便要得恁地曰既知不弘不毅便警醒令弘毅如何討道理教他莫恁地弘毅處固未見得若不弘不毅處亦易見不弘便急迫狹隘不容物只安於卑陋不毅便傾東倒西既知此道理當恁地既不能行又不能守知得道理不當恁地却又

不能割捨除却不弘便是弘除了不毅便是毅這處亦須是見得道理分曉磊磊落落這箇都由我處置要弘便弘要毅便毅如多財善賈須多蓄得在這裏看我要買也得要賣也得若只有十文錢在這裏如何處置得去又曰聖人言語自渾全溫厚曾子便有圭角如士不可以不弘毅如可以託六尺之孤云云

見得曾子直是恁地剛硬孟子氣象大抵如此

萬○
淳錄

云徐問弘毅是為學工夫久方能如此抑合下便當如此曰便要弘毅皆不可一日無曰人之資稟有偏

何以便能如此曰只知得如此便警覺那不如此更
那裏別尋討方法去醫治他弘毅處亦難見不弘不
毅却易見不弘便淺迫便窄狹不容物便安於卑陋
不毅便倒東墜西見道理合當如此又不能行不能
守見道理不當如此又不能捨不能去只除了不弘
便是弘除了不毅便是毅非別討一弘毅來然亦須
是見道理極分曉磊磊落落在這裏無遁情病痛來
便都由自家處置要弘便弘要毅便毅如多財善賈
都蓄在這裏要買便買要賣便賣若止有十文錢在
此則如何處置得○砥錄云居父問士不可不弘毅
學者合下當便弘毅將德盛業成而後至此曰合下
便當弘毅不可一日無也又問如何得弘毅曰但只
去其不弘不毅便自然弘毅弘毅雖難見自家不弘
不毅處却易見常要檢點若卑狹淺隘不能容物安
於固陋便是不弘不毅處病痛更多知理所當為而
不為知不善之不可為而不去便是毅又曰孔子

所言自渾全溫厚如曾
子所言便有孟子氣象

問士不可以不弘毅曰弘是事事着得如進學者要弘
接物也要弘事事要弘若不弘只是見得這一邊不
見那一邊便是不弘只得些了便自足便不弘毅却
是發處勇猛行得來強忍是他發用處問後面只說
仁以為己任是只成就這箇仁否曰然許多道理也
只是這箇仁人也只要成就這箇仁須是擔當得去
又問死而後已是不休歇否曰然若不毅則未死已

前便有時倒了直到死方住又曰古人下字各不同如剛毅勇猛等字雖是相似其義訓各微不同如適問說推與充相似個

仁以為己任不亦重乎死而後已不亦遠乎須是認得箇仁又將身體驗之方真箇知得這擔子重真箇是難世間有兩種有一種全不知者固全無摸索處又有一種知得仁之道如此大而不肯以身任之者今自家全不曾擔著如何知得他重與不重所以學不

貴徒說須要實去驗而行之方知

個

士不可以不弘毅毅者有守之意又云曾子之學大抵如孟子之勇觀此弘毅之說與夫臨大節不可奪與孟子彼以其富我以吾仁之說則其勇可知若不勇如何主張得聖道住如論語載曾子之言先一章云以能問於不能則見曾子弘毅又言臨大節不可奪則見他毅處若孟子只得他剛處却少弘大底氣象

謹

弘而不毅如近世龜山之學者其流與世之常人無以異毅而不弘如胡氏門人都恁地撐腸拄肚少間都

沒頓着處

賀孫

弘寬廣也是事要得寬闊毅強忍也如云擾而毅是馴擾而却毅強而有守底意思弘字如今講學須大着箇心是者從之不是者也且寬心去究而今人才得一善便說道自家底是了別人底都不是便是以先入為主了雖有至善無由見得如執德不弘須是自

家要弘始得若容民蓄衆底事也是弘但是外面事
而今人說弘字多做容字說了則這弘字裏面無用
工處可以此意推之又云弘是開闊周遍

變孫
集注

程子說弘字曰寬廣最說得好此是儘耐得工夫不急
迫如做一件今日做未得又且耐明日做

變孫

問毅訓強忍粗而言之是硬擔當着做將去否楊氏作
力行說正此意但說得不猛厲明白若不足以形容
毅字氣象至程子所謂弘而無毅則無規矩而難立

其說固不可易第恐毅字訓義非可以有規矩言之如何曰毅有忍耐意思程子所云無規矩是說目今難立是說後來必大

士不可以不弘毅先生舉程先生語曰重擔子須是硬着脊梁骨方擔荷得去熹

興於詩章

或問興於詩立於禮成於樂曰興於詩便是箇小底立於禮成於樂便是箇大底興於詩初間只是因他感

發興起得來到成處却是自然後恁地又曰古人自
小時習樂誦詩學舞不是到後來方始學詩學禮學
樂如云興於詩立於禮成於樂非是初學有許多次
第乃是到後來方能如此不是說用工夫次第乃是
得效次第如此又曰到得成於樂是甚次第幾與理
為一看有甚放僻邪侈一齊都滌盪得盡不留些子
興於詩是初感發這些善端起來到成於樂是刮來
刮去凡有毫髮不善都盪滌得盡了這是甚氣象又

曰後世去古既遠禮樂蕩然所謂成於樂者固不可得然看得來只是讀書理會道理只管將來涵泳到泆洽貫通熟處亦有此意思致道云讀孟子熟儘有此意曰也是只是孟子較感發得麓其他書都是如此賀孫因云如大學傳知止章及齊家章引許多詩語涵泳得熟誠有不自己處

賀孫

亞夫問此章曰詩禮樂初學時都已學了至得力時却有次第樂者能動盪人之血氣使人有些小不善之

意都着不得便純是天理此所謂成於樂譬如人之服藥初時一向服了服之既久則耳聰目明各自得力此興詩立禮成樂所以有先後也

時舉

古人學樂只是收斂身心令入規矩使心細而不麓久久自然養得和樂出來又曰詩禮樂古人學時本一齊去學了到成就得力處却有先後然成於樂又見無所用其力

升卿

興於詩立於禮成於樂聖人做出這一件物事來使學

者聞之自然歡喜情願上這一條路去四方八面攬

撮他去這路上行

廣

敬之問興於詩立於禮成於樂覺得和悅之意多曰先
王教人之法以樂官為學校之長便是教人之本末

都在這裏

時舉

正卿說興於詩立於禮成於樂曰到得成於樂自不消

恁地淺說成於此是大段極至

賀孫

只是這一心更無他說興於詩興此心也立於禮立此

心也成於樂成此心也今公讀詩是興起得箇甚麼
個

或問成於樂曰樂有五音六律能通暢人心今之樂雖
與古異若無此音律則不得以為樂矣力行因舉樂
記云耳目聰明血氣和平曰須看所以聰明和平如
何不可只如此說過力行

成於樂曰而今作俗樂聒人也聒得人動况先王之樂
中正平和想得足以感動人燕

問立於禮禮尚可依禮經服行詩樂皆廢不知興詩成樂何以致之曰豈特詩樂無禮也無今只有義理在且就義理上講究如分別得那是非邪正到感慨處必能興起其善心懲創其惡志便是興於詩之功涵養德性無斯須不和不樂直恁地和平便是成於樂之功如禮古人這身都只在禮之中都不由得自家今既無之只得硬做些規矩自恁地收拾如詩須待人去歌誦至禮與樂自稱定在那裏只得自去做苟

子言禮樂法而不說更無可說只得就他法之而已

荀子此語甚好又問志於道據於德依於仁與此相

表裏否曰也不爭多此却有游藝一脚子

寓○淳錄云徐問立

於禮猶可用力詩今難曉樂又無何以興成乎曰今既無此家具只有理義在只得就理義上講究如分別是非到感慨處有以興起其善心懲創其惡志便是興於詩之功也涵養和順無斯須不和樂恁地和平便是成於樂之功也如禮今亦無只是便做些規矩自恁地淑歛古人此身終日都在禮之中不由自家古人興於詩猶有言語以諷誦禮全無說話只是恁地做去樂更無說話只是聲音節奏使人聞之自然和平故荀子曰禮樂法而不說曰此章與志於道相表裏否曰彼是言德性道理此是言事業工夫

此却是游於藝脚子○道夫錄云居父問立於禮猶可用力詩樂既廢不知今何由興成之曰既無此家具也只得以義理養其心若精別義理使有以感發其善心懲創其惡志便是興於詩涵養從容無斯須不和不樂便是成於樂今禮亦不似古人完具且只得自存簡規矩收斂身心古人終日只在禮中欲少自由亦不可得又曰詩猶有言語可諷誦至於禮只得夾定做去樂只是使它聲音節奏自然和平更無說話荀子又云禮樂法而不說只有法更無說也或問此章與志道據德依仁游藝如何曰不然彼就德性上說此就工夫上說只是游藝一脚意思

興於詩此三句上一字謂成功而言也非如志於道四

句上一字以用功而言也

格

仲蔚問興於詩與游於藝先後不同如何曰興立成是

言其成志據依游是言其用功處

變孫錄云志據依是用力處興立成

是成效處

但詩較感發人故在先禮則難執守這須常常

執守始得樂則如太史公所謂動盪血氣流通精神

者所以涵養前所得也問消融渣滓如何曰渣滓是

他勉強用力不出於自然而不安於為之之意聞樂

則可以融化了然樂今却不可得而聞矣

義剛

子壽言論語所謂興於詩又云詩可以興蓋詩者古人

所以詠歌情性當時人一歌詠其言便能了其義故
善心可以興起今人須加訓詁方理會得又失其歌
詠之律如何一去看者便能興起善意以今觀之不
若熟理會論語方能興起善意也 大雅

問注言樂有五聲十二律 云云 以至於義精仁熟而自

和順於道德不知聲音節奏之末如何便能使義精
仁熟和順於道德曰人以五聲十二律為樂之末

錄 溥

云不可謂 若不是五聲十二律如何見得這樂便是
樂之末

無樂了

淳錄云周旋揖遜不可謂禮之末若不
是周旋揖遜則為無禮矣何以見得禮

五聲

十二律皆有自然之和氣古樂不可見要之聲律今
亦難見然今之歌曲亦有所謂五聲十二律方做得
曲亦似古樂一般如彈琴亦然只他底是邪古樂是
正所以不同又問五聲十二律作者非一人不知如
何能和順道德曰如金石絲竹匏土革木雖是有許
多却打成一片清濁高下長短大小更唱迭和皆相
應渾成一片有自然底和氣

淳錄云所以聽之自能
義精仁熟和順於道德

樂於歌舞不是各自為節奏樂只是此一不是各自
節奏歌亦是此一節奏舞亦是此一節奏
為節奏歌者歌此而已舞者舞此而已所以聽之可
以和順道德者須是先有興詩立禮工夫然後用樂
以成之問古者十有三年學樂誦詩二十而冠始學
禮與這處不同如何曰這處是大學終身之所得如
十歲學幼儀十三學樂誦詩從小時皆學一番了做
箇骨子在這裏到後來方得他力禮小時所學只是
學事親事長之節乃禮之小者年到二十所學乃是

朝廷宗廟之禮乃禮之大者到立於禮始得禮之力
樂小時亦學了到成於樂時始得樂之力不是大時
方去學詩却是初間便得力說善說惡却易曉可以

勸可以戒禮只捉住在這裏樂便難精

淳錄云直是工夫至到方

能有成

詩有言語可讀禮有節文可守樂是他人作與

我有甚相關如人唱曲好底凡有聞者人人皆道好
樂雖作於彼而聽者自然竦動感發故能義精仁熟
而和順道德舜命夔典樂教胄子直而溫寬而栗剛

而無虐簡而無傲定要教他恁地至其教之之具又
却在於詩言志歌永言聲依永律和聲處五聲十二
律不可謂樂之末猶揖遜周旋不可謂禮之末若不
揖遜周旋又如何見得禮在那裏又問成於樂處古
人之學有可證者否曰不必恁地支離這處只理會
如何是興於詩如何是立於禮如何是成於樂律呂
雖有十二用時只用七箇自黃鐘下生至姑洗便住
了若更要挿一箇便拗了如今之作樂亦只用七箇

如邊頭寫不成字者即是古之聲律若更添一聲便

不成樂

寓○
集注

問注云樂有五聲十二律更唱迭和恐是迭為賓主否
曰書所謂聲依永律和聲蓋人聲自有高下聖人制
五聲以括之宮聲洪濁其次為商羽聲輕清其次為
徵清濁洪纖之中為角此五聲之別以括人聲之高
下聖人又制十二律以節五聲故五聲中又各有高
下每聲又分十二等謂如以黃鍾為宮則是太簇為

商姑洗為角林鍾為徵南呂為羽還至無射為宮便是黃鍾為商太簇為角中呂為徵林鍾為羽然而無射之律只長四寸六七分而黃鍾長九寸太簇長八寸林鍾長六寸則宮聲槩下面商角羽三聲不過故有所謂四清聲夾鍾大呂黃鍾太簇是也蓋用其半數謂如黃鍾九寸只用四寸半餘三律亦然如此則宮聲可以槩之其聲和矣不然則其聲不得其和看來十二律皆有清聲只說四者意其取數之甚多者

言之餘少者尚庶幾焉某人取其半數為子聲謂宮律之短餘則用子聲某人又破其說曰子聲非古有也然而不用子聲則如何得其和畢竟須着用子聲想古人亦然但無可考耳而今俗樂多用夾鍾為黃鍾之宮蓋向上去聲愈清故也又云今之琴第六七絃是清聲如第一二絃以黃鍾為宮太簇為商則第六七絃即是黃鍾太簇之清蓋只用兩清聲故也

燕

正淳問謝氏謂樂則存養其善心使義精仁熟自和順

於道德遺其音而專論其意如何曰樂字內自括五音六律了若無五音六律以何為樂

必太。集義

民可使由之章

問民可使由之曰所謂雖是他自有底却是聖人使之由如道之以德齊之以禮教以人倫父子有親君臣有義夫婦有別長幼有序朋友有信豈不是使之由問不可使知之曰不是愚黔首是不可得而使之知也呂氏謂知之未至適所以啟機心而生惑志說得

是問此不知與百姓日用不知同否曰彼是自不知此是不能使之知淳

植云民可使之仰事俯育而不可使之知其父子之道為天性可使之奔走服役而不可使之知其君臣之義為當然及諸友舉畢先生云今晚五人看得都無

甚走作植

或問民可使由之不可使知之曰聖人只使得人孝足矣使得人弟足矣却無緣又上門逐箇與他解說所

以當孝者是如何所以當弟者是如何自是無緣得
如此頃年張子韶之論以為當事親便當體認取那
事親者是何物方識所謂仁當事兄便當體認取那
事兄者是何物方識所謂義某說若如此則前面方
推這心去事親隨手又便去背後尋摸取這箇仁前
面方推此心去事兄隨手又便着一心去尋摸取這
箇義是二心矣禪家便是如此其為說曰立地便要
你究得恁地便要你究得他所以撐眉努眼使棒使

喝都是立地便拶教你承當識認取所以謂之禪機
若必欲使民知之少間便有這般病某嘗舉子韶之
說以問李先生曰當事親便要體認取箇仁當事兄
便要體認取箇義如此則事親事兄却是沒緊要底
事且姑借此來體認取箇仁義耳李先生笑曰不易
公看得好或問上蔡愛說箇覺字便是有此病了曰
然張子韶初間便是上蔡之說只是後來又展上蔡
之說說得來放肆無收煞了或曰南軒初間也有以

覺訓仁之病曰大槩都是自上蔡處來又曰呂氏解
民可使由之不可使知之云不可使知非以愚民蓋
知之不至適以起機心而生惑志也此說亦自好所
謂機心便是張子韶與禪機之說方纔做這事便又
使此心去體認少間便啟人機心只是聖人說此語
時却未有此意在向姑舉之或問不欲附集注或曰
王介甫以為不可使知蓋聖人愚民之意曰申韓莊
老之說便是此意以為聖人置這許多仁義禮樂都

是殃人考淮南子有一段說武王問太公曰寡人伐
紂天下謂臣殺主下伐上吾恐用兵不休爭鬪不已
為之奈何太公善王之問教之以繁文滋禮以持天
下如為三年之喪令類不蓄厚葬久喪以亶音丹其家
其意大槩說使人行三年之喪庶幾生子少免得人
多為亂之意厚葬久喪可以破產免得人富以啓亂
之意都是這般無稽之語 側

民可使由之一章舊取楊氏說亦未精審此章之義自

與盤詰之意不同商盤只說遷都周詰只言代商此不可不與百姓說令分曉况只是就事上說聞者亦易曉解若義理之精微則如何說得他曉必大

好勇疾貧章

好勇疾貧固是作亂不仁之人不能容之亦必致亂如

東漢之黨錮

咏

如有周公之才之美章

周公之才之美此是為有才而無德者言但此一段曲

折自有數般意思驕者必有吝吝者必有驕非只是吝於財凡吝於事吝於為善皆是且以吝財言之人之所以要吝者只緣我散與人使他人富與我一般則無可矜誇於人所以吝某嘗見兩人只是無緊要閒事也抵死不肯說於人只緣他要說自會以是驕誇人故如此因曾親見人如此遂曉得這驕吝兩字只是相匹配得在故相靠得在

池錄作相比配相靠在這裏○義剛

驕吝是挾其所有以誇其所無挾其所有是吝誇其所

無是驕而今有一樣人會得底不肯與人說又却將

來驕人

個

正卿問驕如何生於吝曰驕却是枝葉發露處吝却是根本藏蓄處且以淺近易見者言之如說道理這自是世上公共底物事合當大家說出來世上自有一般人自恁地吝惜不肯說與人這意思是如何他只怕人都識了却沒詫異所以吝惜在此獨有自家會別人都不會自家便驕得他便欺得他如貨財也是

公共底物事合使便着使若只恁地吝惜合使不使
只怕自家無了別人却有無可強得人所以吝惜在
此獨是自家有別人無自家便做大便欺得他又云
為是要驕人所以吝賀孫

或問驕吝曰驕是傲於外吝是靳惜於中驕者吝之所
發吝者驕之所藏祖道

某昨見一箇人學得些子道理便都不肯向人說其初
只是吝積蓄得這箇物事在肚裏無奈何只見我做

大便要陵人只此是驕恪

聖人只是平說云如有周公之才美而有驕吝也連得才美功業壞了况無周公之才美而驕吝者乎甚言驕吝之不可也至於程子云有周公之德則自無驕吝與某所說驕吝相為根本枝葉此又是發餘意解者先說得正意分曉然後却說此方得賀孫

先生云一學者來問伊川云驕是氣盈吝是氣歉歉則不盈盈則不歉如何却云使驕且吝試商量看伯豐

對曰盈是加於人處歉是存於己者粗而喻之如勇
於為非則怯於遷善明於責人則暗於恕己同是一
箇病根先生曰如人曉些文義吝惜不肯與人說便
是要去驕人非驕無所用其吝吝非吝則無以為驕
問驕氣盈吝氣歉氣之盈歉如何曰驕與吝是一般病
只隔一膜驕是放出底吝是不放出底驕正如人
病寒熱攻注上則頭目痛攻注下則腰腹痛熱發出
外似驕寒包縮在內似吝因舉顯道克己詩試於清

夜深思省剖破藩籬即大家問當如何去此病曰此
有甚法只莫驕吝便是剖破藩籬也覺其為非從
源頭處正我要不行便不行要坐便還我坐莫非由
我更求甚方法

寓

集注云驕吝雖不同而其勢常相因先生云孔子之意
未必如此某見近來有一種人如此其說又有所為
也

炎

驕者吝之枝葉吝者驕之根本某嘗見人吝一件物便

有驕意見得這兩字如此

吝者驕之根本驕者吝之枝葉是吝為主蓋吝其在我則謂我有你無便是驕人也

熈

讀驕吝一段云亦是相為先後

時舉

三年學章

問不至於穀欲以至為及字說謂不暇及於祿免改為志得否曰某亦只是疑作志不敢必其然蓋此處解不行作志則略通不可又就上面撰便越不好了或

又引程子說曰說不行不如莫解解便不好如解白
為黑一般

問三年學而不至於穀是無所為而為學否曰然熹

篤信好學章

學者須以篤信為先

○劉子澄說
端蒙

篤信故能好學守死故能善道惟善道故能守死惟好

學故能篤信每推夫子之言多如此德明

惟篤信故能好學惟守死故能善道善如善吾生善吾

死之善不壞了道也然守死生於篤信善道由於好
學徒篤信而不好學則所信者或非所信徒守死而
不能推以善其道則雖死無補

升卿

篤信須是好學但要好學也須是篤信善道須是守死
而今若是不能守死臨利害又變了則亦不能善道
但守死須是善道若不善道便知守死也無益所以
人貴乎有學篤信方能守死好學方能善道

義剛
恪錄云

此兩句相關自是四事惟篤信
故能守死惟好學故能善道

危邦不入是未仕在外則不入亂邦不居是已仕在內
見其紀綱亂不能從吾之諫則當去之

淳

危邦不入舊說謂已在官者便無可去之義若是小官
恐亦可去當責任者則不容去也

必大

或問危邦固是不可入但或有見居其國則當與之同
患難豈復可去曰然到此無可去之理矣然其失則
在於不能早去當及其方亂未危之時去之可也

側

天下無道譬如天之將夜雖未甚暗然此自只向暗去

知其後來必不可支持故亦須見幾而作可也

時舉

不在其位章

馬莊甫問不在其位不謀其政曰此各有分限田野之人不得謀朝廷之政身在此間只得守此如縣尉豈可謀他主簿事纔不守分限便是犯他疆界馬曰如縣尉可與他縣中事否曰尉佐官也既以佐名官有繁難只得伴他謀但不可侵他事權

大雅

師摯之始章

徐問闕雎之亂何謂樂之卒章曰自闕闕雎鳩至鐘鼓樂之皆是亂想其初必是已作樂只無此詞到此處

便是亂

溥

或問闕雎之亂亂何以訓終曰既奏以文又亂以武節

亂曰者亂乃樂終之雜聲也亂出國語史記又曰闕雎

恐是亂聲前面者恐有聲而無辭

揚

狂而不直章

狂是好高大便要作聖賢宜直侗是愚模樣不解一事

底人宜謹。慍慍是拙，模樣無能。為底人宜信。有是德，則有是病。有是病，必有是德。有是病而無是德，則天下之棄才也。

泳

問：狂而不直之狂，恐不可以進取之狂。當之欲目之，以輕率可否？曰：此狂字固卑下，然亦有進取意思。敢為大言，下梢却無收拾是也。

必大

問：侗者同也。於物同然，一律無所識別之謂慍者，空也。空而又空，無一長之實之謂先生以為此亦因舊說。

而以字義音訓推之恐或然爾此類只合大槩看不
須苦推究也

學如不及章

學如不及猶恐失之如今學者却恁地慢了譬如捉賊
相似須是着起氣力精神千方百計去趕捉他如此
猶恐不獲今却只在此安坐熟視他不管他如何奈
得他何只快時起來行得三两步懶時又坐恁地如
何做得事成

巍巍乎章

看巍巍乎舜禹之有天下至禹吾無間然四章先生云
舜禹與天下不相關如不曾有這天下相似都不曾
把一毫來奉已如今人纔富貴被他勾惹此乃為
物所役是自卑了若舜禹直是高首出庶物高出萬
物之表故夫子稱其巍巍又曰堯與天為一處民無
能名所能名者事業禮樂法度而已

正卿問舜禹有天下而不與莫是物各付物順天之道

否曰據本文說只是崇高富貴不入其心雖有天下而不與耳巍巍是至高底意思大凡人有些小物事便覺累其心今富有天下一似不曾有相似豈不

是高

恪

不與只是不相干之義言天下自是天下我事自是我事不被那天下來移着

義剛

正淳論不以位為樂恐不特舜禹為然曰不必如此說如孟子論禹湯一段不成武王不執中湯却泄邇忘

遠此章之首與後章禹無間然之意同是各舉他身
上一件彻底事言之必大

因論舜禹有天下而不與之義曰此等處且玩味本文
看他語意所重落向何處明道說得義理甚闊闊集
注却說得小然觀經文語意落處却恐集注得之必大

大哉堯之為君章

惟天為大惟堯則之只是尊堯之詞不必謂獨堯能如
此而他聖人不與也淳

惟堯則之一章曰雖蕩蕩無能名也亦有巍巍之成功

可見又有煥乎之文章可觀

讚

大哉堯之為君炎謂吳才老書解說驩兜共工輩在堯朝堯却能容得他舜便容他不得可見堯之大處舜終是不若堯之大曰吳解亦自有說得好處舜自側微而興以至即帝位此三四人終是有不服底意舜只得行遣故曰四罪而天下咸服

炎

舜有臣五人章

魏問集注云惟唐虞之際乃盛於此此恐將舜有臣五人一句閒了曰寧可將上一句存在這裏若從元注說則是亂臣十人却多於前於今為盛却是舜臣五人不得如後來盛

賀孫

李問至德曰三分天下有其二天命人心歸之自可見其德之盛了然如此而猶且不取乃見其至處

雉

問三分天下有其二以服事商使文王更在十三四年將終事紂乎抑為武王牧野之舉乎曰看文王亦不

是安坐不做事底人如詩中言文王受命有此武功
既伐於崇作邑於豐文王烝哉武功皆是文王做來
詩載武王武功却少但卒其武功耳觀文王一時氣
勢如此度必不終竟休了一似果實文王待他十分
黃熟自落下來武王却似生拍破一般

寓

或問以為文王之時天下已二分服其化使文王不死
數年天下必盡服不俟武王征伐而天下自歸之矣
曰自家心如何測度得聖人心孟子曰取之而燕民

不悅則勿取古之人有行之者文王是也聖人已說
底話尚未理會得何況聖人未做底事如何測度得
後再有問者先生乃曰若紂之惡極文王未死也只
得征伐救民

個

問文王受命是如何曰只是天下歸之問太王翦商是
有此事否曰此不可考矣但據詩云至於太王實始
翦商左傳云泰伯不從是以不嗣要之周自日前積
累以來其勢日大又當商家無道之時天下趨周其

勢自爾至文王三分有二以服事殷孔子乃稱其至德若非文王亦須取了孔子稱至德只二人皆可為而不為者也周子曰天下勢而已矣勢輕重也周家基業日大其勢已重民又日趨之其勢愈重此重則彼自輕勢也

璘

因說文王事商曰文王但是做得從容不迫不便去伐商太猛耳東坡說文王只是依本分做諸侯自歸之或問此有所據否曰這也見未得在但是文王伐崇

戡黎等事又自顯然書說王季勤勞王家詩云太王
翦商都是他子孫自說不成他子孫誣其父祖春秋
分明說泰伯不從是不從甚底事若泰伯居武王之
世也只是為諸侯但時措之宜聖人又有不得已處
橫渠云商之中世都棄了西方之地不管他所以戎
狄復進入中國太王所以遷於岐然岐下也只是箇
荒涼之地太王自去立箇家計如此 夔孫

問文王三分天下有其二一段據本意只是說文王或

問中載胡氏說文兼武王而言以為武王之間以服事商如何曰也不消如此說某也謾載放那裏這箇難說而今都回互箇聖人說得忒好也不得如東坡罵武王不是聖人又也無禮只是孔子便說得來平如武未盡善此等處未消理會且存放那裏

個

禹吾無間然章

范益之問五峯說禹無間然矣章云是禹以鯀遭殛死而不忍享天下之奉此說如何曰聖人自是薄於奉

已而重於宗廟朝廷之事若只恁地說則較狹了後
來著知言也不曾如此說

義剛

黻蔽膝也以韋為之韋熟皮也有虞氏以革夏后氏以
山殷火周龍章祭服謂之黻朝服謂之韠左氏帶裳

韠烏咏



朱子語類卷三十五